

Uunga Siunnersuut: Inatsisartut inatsisaat nr. 5, 3. December 2018-imeersup allanngortinneqarnissaa

(Avatangiisinut, Pinngortitamut, Nukissiuutinut Ilisimatusarnermullu Naalakkersuisoq)

Saqqummiussissut

(Avatangiisinut, Pinngortitamut, Nukissiuutinut Ilisimatusarnermullu Naalakkersuisoq)

1. siullermeerneqarnera

Naalakkersuisut sinnerlugit matumuuna Inatsisartut inatsisaat nr. 5, 3. December 2018-imeersup erngup nukingata nukissornermut atorneqartarnera pillugu allanngortinneqarnissaanut siunnersuut saqqummiutissavara.

Erngup nukinganik nukissiorneq Nunatsinni pigisatta annerpaat ilagaat. Nunami sumiiffinni arlalinni minguitsumik akikitsumillu nukissiornissamut tunngaviuvoq, aamma nunanit allanit erngup nukinganik atuinnermut aningaasaliissuteqarnissamik pileritsatsitsinikkut nunatsinnut isertitaqarnissamut periarfissaavoq.

Naalakkersuisut maannakkut Tasersiami Tarsartuup tasersuanilu erngup nukinganik nukissiorfissuit neqeroorutiginnissaannut piareersarput. Piareersarnerup nalaani paasinarsivoq inatsimmi aalajangersakkat arlallit allanngortinneqartariaqartut, piumasaqaatit erseqqinnerulerniassammata ingerlatseqatigiiffinnullu nukissiorfinnut aningaasaliissusanut pilerinarnerulerniassammata.

Naalakkersuisut allannguutissatut siunnersuutaat ingerlatseqatigiiffinnut erngup nukinganik nukissiorfimmud aningaasaliiumasunut pilerinarnerulersitsissaaq.

Siunnersuummi pingaarnersaavoq akuersissutinik tunniussisarnerup ukiunik 40-nit 60-inut sivitsorneqarnissaa. Akuersissutip sivilunerpaamik ukiuni 80-ini atuussinnaanera allannguuteqarani attatiinnarneqassaaq, allannguinerulli Naalakkersuisut ukiunik 60-inik sivilussuseqartumik akuersissutinik tunniussisinnalissapput, suliniutip annertussusissaa aningaasaqarneralu apeqqutaatillugit. Aningaasaliisartut aningaasaleerusussuseqarnerulernissaat siunertaavoq, piffissami sivilunerusumi atorluaanerup isertitassaat qularnaassammagit.

Tamanna nunanit allanit aningaasaliissarsiorinnissamut periarfissaqarnerulersitsissaaq, taamaalillutalu erngup nukinganik niuernikkut atuinnerup iluanaarutaasinnaanera annertusissallutigu.

Ilutigalugu erseqqissarusuppara avatangiisinik pinngortitamillu piumasaqaativut aalajangiisumalluinnaratsigit. Sanaartorneq aallartinneqarsinnaanngilaq uppersaait pisariaqartut Naalakkersuisunit akuersissutigineqartinnagit. Allanguissutigisassaq tassaavoq akuersissummik tunniussiniarnermi tullerriaarneq piffissarlu atuiffiusoq, tamannalu aningaasaliisunut eqaannerusumik ingerlanissamut periarfissiissaaq.

Pinngortitap pisuussutaanik tamatta immikkut atuinerup illersorneqarnissaanik
ilisimatuussutsikkullu tunngavissaqarluarneranik qulakkeerinnittumik piumasaqaatinik
aalajangiusimanninnerput attatiinnarparput.

Naalakkersuisut inatsisissatut siunnersuutip akuerineqarnissaa innersuussutigaat.